

## Inyarubha ya Paauru kwa Abheefeso Ubhukangati

Inyarubha ya Paauru kwa abhahimba bha Yisu bha urubhiri rwa Efeeso, akaandika hanu aari mokebhoho. Urubhiri rwa Efeeso rwari ni-rumwi ya zimbiri zikuru za ubhukangati bhwa Abharumi. Efeeso yaari neyo itangi yu ubhusuruja nu ubhuniibhi, na kwari na Abhayaahudi bhaaru. Paauru akaja iyo ribhaga ryo orogendo rwazi rwa kabhiri na rwa katatu rwu ukuja karagan'ya Ing'ana Inzamu iguru wa Yisu (Amahocha ga Abhatumwa 18:19-22, 19:1-41) na akiikara kwi ibhaga rya myaka ibhiri.

Inyarubha yinu iragambira ubhwindi bhwa Mungu bhwu ukusabhura abhaatu. Paauru arabhahiitya kubha Yisu akakwa kumusarabha korereke atusabhuri, nawe Mungu akamuryura, na nangu ana Mungu ahagero ahazamu bhukung'u, inu akukangata nangwinu na kemerano.

Munyarubha yinu manga kabhiri Paauru arasabhira abhiisirirya abhakindichazi Efeeso iyo. Arakumya Mungu iguru wu ubhwisirirya nu ubhusigi bhwabhu, wusi arasabha Mungu abhasakiryi bhamenye ubhunaja bhwa Mungu chimbu bhuri nu ubhusigi bhwa Yisu bhunu bhutaana kerengo.

Ring'ana rya Abhakiriisitu bhusi kubha kegero kimwi na Yisu ni bhweru bhukung'u munyarubha, na iragambwa manga merongo ibhiri. Paauru

arabhurira Abheefeeso, abhaatu bhanu bhabhwini ubhwikari ubhuhya bhareenderwa kokora amahocha amahya.

Akumara, Paauru ariija abhakari na abhasubhi bhaabhu, abhiibhuri na abhaana, na bhambuusa na bhanu bhataru bhambuusa kokora bhwaheene chimbu abhiisirirya bha Yisu bhakwenderwa kwikara. Itiniru, ariija iguru we ebheseme bhya rihi rye ekoro.

### *Amakeeren'ya*

<sup>1</sup> Inyarubha yinu nandikiri inyi Paauru, umutumwa\* wa Yisu Kiriisitu kubhusigi bhwa Mungu. Nirabhaandikira imwi abharindu† bha Mungu bhanu mukwikara [Efeeso]. Imwi, ni-bharonge ku kugwatanana na Yisu Kiriisitu.

<sup>2</sup> Ihigangi no omorembe kurwa kwa Bhaabha Mungu, na kumukuru Yisu Kiriisitu, bhibhi na niimwi.

### *Urubhangu rwe ekoro kwa abhiisirirya*

<sup>3</sup> Akumibhwi Mungu, Bhaabha wu Umukuru witu Yisu Kiriisitu, ku kubha ku kutugwatan'ya na Kiriisitu, akatoha urubhangu rwesi rwa mokoro, ko kotoha urubhangu runu ruri mwisaaru.

<sup>4</sup> Hanu Mungu aari akiri kubumba isi, akatorobhora tubhi bhaazi, kunzira yu ukutugwatan'ya na Kiriisitu. Akakorabhu, korereke tubhi abharindu bhanu tutaana isoro mubhutangi bhwazi. Kubhusigi bhwazi,

---

\* **1:1 Umutumwa.** Kamaragirira bhakung'u, rora ring'ana abhatumwa muKiniibhasa. † **1:1 Abharindu.** Kamaragirira bhakung'u, rora Ikiniibhasa.

5 Mungu aari indiri kwima ikari, kotokora kubha abhaana bhaazi kanzira ya Yisu Kiriisitu. Akeenda kokorabhu, ku kubha nimbu yamuzumiri.

6 Mmbe akumibhwi Mungu kubhigangi bhyazi, bhinu atuhiri bhaha kanzira yu Umwana waazi† amusiigwa.

7 Mungu atasabhwiri kanzira ya amasaahi ga Yisu Kiriisitu, atubhiriri ubhushi bhwitu bhwusi, kuring'ana nu ubhwaru bhwi ibhigangi bhyazi.

8 Ewe akatohererya urubhangu rwazi, hamwimwi na kotoha amang'ini nu ubhwabhuri bhwaru.

9 Atukiriri twobhoore isiimi yaazi yinu yaari yibhisiri, na akayihicha kuhitira kwa Kiriisitu, chimbu indiri.

10 Isiimi ya Mungu ni-kubha, ribhaga rinu indiri hanu rikuhika, arabhitura ebhegero bhyusi bhya mwisaaru na bhya kuusi bhibhi iyaasi wu ubhukangati bhwa Kiriisitu.

11 Ku ukugwatana na Kiriisitu, itwi Abhayaahudi tugabhiibhwi ubhasabhuri chimbu twaringirwi nu ubhwindi bhwa Mungu, amukari wa amang'ana guusi kuring'ana nu ubhwindi bhwazi.

12 Akakorabhu iguru wiitu, bhanu twari bhe embere kwisega Kiriisitu, korereke Mungu akumibhwi.

13 Imwusi abhaatu bhanu bhataru Abhayaahudi, mukiigwa amang'ana ga amaheene, gi ing'ana inzumu ya ubhasabhuri bhwanyu. Hanu mwisiriiryi Kiriisitu, Mungu wusi akabhakaama

† 1:6 **Umwana waazi.** Kumaragirira bhukung'u, rora ring'ana Umwana wa Mungu muKiniibhasa.

urukaamu, ku ukubhaha Egoro Indindu§ yinu aabharagin'yi. Ko kokorabhu, akeereken'ya, imwi ni-bhaazi.

<sup>14</sup> Egoro Indindu yiyo yangi ichirikin'yu cha Mungu kwa niitwi, Mungu aratoha bhyasi bhinu aaragin'yi. Egoro yiyo neyo Mungu atiri kuhika hanu ariitusabhuri itwi abhaatu bhaazi. Tukumyi Mungu bhukang'u!

### *Paauru arasabhira Abhakiriisitwa bha Efeeso*

<sup>15</sup> Nirakumya Mungu ku kubha amang'ana gayo guusi aatukuriiri. Kwima hanu niigwiri chimbu mukwisirirya Umukuru Yisu na kusiga abharindu bhusi bha Mungu,

<sup>16</sup> nikiiri kutiga kukumya Mungu iguru waanyu. Nirabhahiita ribhaga ryasi mumasabhi gaani.

<sup>17</sup> Nirasabha Mungu wu Umukuru wiitu Yisu Kiriisitwa, Bhaabha umugungwa, abhahi Egoro yaazi yinu ikubhaha ubhwabhuri nu ubhwirikibhwa, korereke muturi komomenya bhukang'u.

<sup>18</sup> Niramusabha abhasakiryi korereke momenye bhwaheene kinu abhabhirikiriiri musang'aani, neho mabhi nu ubhwisigi bhwe eheene. Muturi kwobhoora ubhuniibhi bhwa ubhugabhi bhwazi ubhuzumu bhunu aaragin'yi abharindu bhaazi.

<sup>19</sup> Kwiki mwobhoore ubhunaja bhwazi ubhukuru iguru wiitu abhiisirirya. Ubhunaja bhuyo bharakora emeremo, kuring'aana na amanaga gaazi amakuru,

---

§ 1:13 **Egoro Indindu.** Kumaragirira bhukang'u, rora ikiniibhasa.

20 ganu aakuriri kwa Kiriisitu hanu aamuryukwiri mabhaku. Akumara akamwikarya urubhaara rwazi rwu ubhurya mwisaaru.

21 Ni iguru iyo, Kiriisitu arakangata iguru wa bhushi bhanu bhari kowereero yinu itakororekana, abhakangati bhaabhu, bhu ubhunaja, bha amanaga na bhi imyeya jusi. Arakangata kwa bhushi, itari kushi yinu iyeene, nuru kushi yinu ikuuza.

22 Mungu atiri ebhegero bhyusi mumabhoko gaazi, na kumutwira mwisengerero abhi Umukuru we ebhegero bhyusi nchu umutwi kumabhiri.

23 Risengerero ni-mabhiri gwa Kiriisitu, na ryizwiri ubhunagu bhwazi. Ewe newe akunaja ebhegero bhyusi hushushi.

## 2

### *Mungu ahaasabhura kurubhangu rwazi*

1 Imwi mwari bhaku, ku kubha yu ubhusarya nu ubhubhi bhwanyu.

2 Ribhaga riyo, mwari murakora amang'ana amabhi gi isi yinu. Mwari muriitegeerera Shitaani,\* umutimi wa amasambwa ganu gatakororekana, na ahaakora emeremo kubhanu bhatakwigwa Mungu.

3 Itwasi, twari nchebho, tukiikara kuring'aana ne ebhoono yi imibhiri jitu, inu tarakora amang'ana ganu gaazumiri imibhiri jitu nu ubhwindi bhwitu. Tukiibhurwa ni isimuka yu ubhubhi ncha abhaatu abhandi, na twari toreenderwa ukutinirwa kwa Mungu.

---

\* **2:2 Shitaani.** Kamaragirira bhukung'u, rora ikiniibhasa.

4 Nawe Mungu ni-wi ibhigangi bhyaru, na ku kubha atusiigiri kubhusigi bhwazi ubhukuru,

5 akatokora bhahuru hamwimwi na Kiriisitu. Akakorabhu nuru twari bhaku iguru wa ubhubhi bhwitu. Kubhigangi bhya Mungu imwi musabhwirwi.

6 Ku ukutugwatan'ya na Yisu Kiriisitu, Mungu akaturyura kurwa mabhaku hamwimwi na Kiriisitu, akatwikarya hamwimwi nawe mwisaaru.

7 Akakorabhu, korereke ereken'ye kwa bhushi kwibhaga rinu rikuuza, ubhuzumu bhwazi kwa niitwi kuhitira Yisu Kiriisitu, kubhigangi bhyazi bhyaru bhina bhitaana tinira.

8 Musabhwirwi kubhigangi bhyazi, kunzira yu ukwisirirya Yisu Kiriisitu. Ubhutuurya bhuyo, bhutakurwa kwa niimwi, ni-mubhanu kurwa kwa Mungu.

9 Ataabhasabhwiri iguru wa amahocha gaanyu, matu wawushi ataaza kwikumya.

10 Itwi tubhumbirwi bhuhya na Mungu. Akakorabhu ku ukutugwatan'ya na Yisu Kiriisitu, tokore amahocha amazumu ganu aakuriri kwima ikari korereke tugakore.

### *Ubhwmwimwi kunzira ya Kiriisitu*

11 Mmbe, imwi bhanu isimaka yanyu, ni-bhaatu bhi ibhyaru ibhindi, mataari Abhayaahudi. Abhayaahudi bharabhabhirikira “abhariisha,” nawe ebho bhariibhirikira “abhasaarwa,”† ku kubha yi isaaru yi imibhiri jabhu, yinu ekokorwa na abhaatu. Imwi muhiiti chimbu mwari ribhaga riyo,

---

† 2:11 **Abhasaarwa.** Kamaragirira bhukung'u, rora ring'ana ukusaara muKiniibhasa.

12 m̄taari mw̄zi iḡu wa Kiriisitu, m̄taari bhamwi na abhaatu bha Izirairi, mwari bhagini bhanu m̄taari nu ubh̄ragi† bhanu Mungu aabharagin'yi. Kwibhu m̄taari nu ubh̄wisigi na mukiikara ncha abhaatu bhanu bhatiizi Mungu m̄usi yinu.

13 Nawe nangu, ku ukugwatana kwa niimwi na Ȳisu Kiriisitu, bhanu ikari mwari kore, m̄bh̄ri haguh̄ kanzira ya amasaahi ga Kiriisitu.

14 Kiriisitu umwene ariitiri omorembe gati wiitu, Abhayaahudi na bhanu bhatari Abhayaahudi. Itwi bhanu twari tutaaniri, akatokora tubhi bhamwi. Akaasha inyiki yu ubhubhisa bhanu bhwatutaaniryi.

15 Hanu aahurukiryi um̄bh̄ri gwazi, akaruushaho imigira ja Mungu hamwimwi na amaswaja gaazi, korereke kurwa amaribhita abh̄ri gayo, akore riribhita rimwi riihya. Ibh̄u nimbu aariitiri omorembe gati wiitu.

16 Kiriisitu akaruushaho ubhubhisa bhwiitu kanzira yu ukukwa kwazi kum̄sarabha. Ko kokorabhu akagwatan'ya amaribhita abh̄ri gayo kubha rimwi, na kutugwatan'ya kwa Mungu.

17 Mmbe, Kiriisitu akaaza, akarwaza Ing'ana Inzamu iḡu wo omorembe, kwa niimwi bhanu mwari kore, na kwa Abhayaahudi bhanu bhiir̄zi bhamwizi.

18 Nangu kuhitira kwawe, itw̄si, Abhayaahudi na bhanu bhatari Abhayaahudi, tubhwini umweya gu ukwisukira Bhaabha kanzira yimwi, ku kuhitira Ekoru Indindu.

---

† 2:12 *Ubh̄ragi*. Kumaragirira bh̄kung'u, rora Ikiniibhasa.

<sup>19</sup> Mmbe nangu, imwi Abheefeeso bhanu mutari Abhayaahudi, mutari bhagini na bhahiti, nawe mabhiiri abhiikari hamwimwi na abharindu, abhaatu bha munyumba ya Mungu.

<sup>20</sup> Ni inyumba yiyo yambakirwi kubhuruza, nu ubhuruza bhuyo, ni-bhatumwa na abharutiriri. § Yisu Kiriisitu umwene, ni-riibhwi rikuru ryu ubhuruza bhuyo.

<sup>21</sup> Ewe newe akwambaka rikindasi ryasi kuhika riragwatana bhwaheene, na korekora ribhi ikuru ncha rihekaaruru ririndu ryu Umukuru.

<sup>22</sup> Ku ukugwatana nawe, imwasi maragwatanibhwa hamwimwi mabhi ubhwikari bhwa Mungu kanzira ye Egoro yaazi.

### 3

*Amahocha ga Paauru kubhaatu bhi ibhyaru ibhindi*

<sup>1</sup> Iguru wa gayo, niinyi Paauru, nirabhasabhira kwa Mungu. Nibhahirwi iguru we emeremo ginu Yisu Kiriisitu aang'iri ju ukurwaza ing'ana Inzumu, kubhaniimwi bhanu mutari Abhayaahudi.

<sup>2</sup> Maheene Mungu antiiri kubha omohocha waazi wu ukurwaza ing'ana Inzumu yi ibhigungi bhyazi kwa niimwi. Nizi mwamariri kwigwa giyo.

<sup>3</sup> Na Mungu umwene akahumburira imbisi yaazi, chimbu nakangatiri kubhaandikira kwa mang'ana masuuhu.

---

§ 2:20 *Ubhuruza bhuyo, ni-bhatumwa na abharutiriri, ubhagaruri ubhandi bharatura kubha, ubhuruza bhuyo bhatirwi na abhatumwa na abharutiriri.*

<sup>4</sup> Moreesome amang'ana gayo, muratura kwobhoora chimbu nizi isiimi ya Mungu iguru wa Kiriisitu.

<sup>5</sup> Ikari hayo, Mungu ataahumburiiri abhaatu isiimi yaazi yiyo. Nawe nangu akuriiri Ekoru yaazi kubhahumburira abhatumwa na abharutiriri bhaazi abharindu.

<sup>6</sup> Isiimi yaazi ni-kubha, kanzira yu ukwisirirya Ing'ana Inzumu, abhaatu bhanu bhatari Abhayaahudi na Abhayaahudi bharagabha hamwimwi ubhutiimi bhwa Mungu. Bharabha hamwimwi nchi ibhiimu bhyu umubhiri. Kuitira Yisu Kiriisitu bharasung'aana hamwimwi ubhuragi bhanu Mungu aaragiin'yi kubhahaka Abhayaahudi.

<sup>7</sup> Mungu akankora omohocha wu ukuragan'ya Ing'ana Inzumu yinu, kurwa kubhigangi bhyazi. Akang'a ibhigangi bhiyo kubhunaja bhwazi mubhwikari bhwani.

<sup>8</sup> Inyi ni-musuuhu kukira abharindu bhusi bha Mungu, nawe Mungu akang'a ibhigangi bhinu kurwazira abhaatu bhanu bhatari Abhayaahudi, ubhuniibhi bhwa Kiriisitu bhanu bhataana kerengo,

<sup>9</sup> na kubhabhurira bhusi, bhamenye chimbu akumara isiimi yaazi. Isiimi yiyo yaari ibhisirwi ibhaga ryasi na Mungu, Umubhumbi we ebhegero bhyusi.

<sup>10</sup> Ubhwindi bhwazi ni-kubha, ubhwubhuri bhwazi bhwa teemwa nzaru, bhomeyekani abhatimi na abhakuru bhe ewereero yinu itakororekana, kanzira ya risengerero.

<sup>11</sup> Mungu akakorabhu kuring'aana ni isiimi yaazi ya zisiku zusi, yinu aamariri kanzira ya Yisu

Kiriisitu, Umukuru witu.

<sup>12</sup> Nangu, ku kubha turiisirirya Yisu Kiriisitu na tugwatiini nawe, turatura kuja kwa Mungu tataana bhwubha.

<sup>13</sup> Mmbe, nirabhasabha mutakwa umwuyu ku kubha yi inyaaku yinu nekobhona iguru waanyu, ku kubha ereerecha nirabhasuka.

### *Paauru arasabhira Abhakiriisitu*

<sup>14</sup> Mmbe, ku kubha ya amang'ana gayo guusi, nirahigamira Bhaabha Mungu.

<sup>15</sup> Ewe newe isimuka ye ebhegero bhyusi bhya mwisaaru na kuusi.

<sup>16</sup> Nirasabha Mungu, kuring'aana nu ubhuni-ibhi bhu ubhugungu bhwazi, abhahi amanaga, kuhitira Ekoroyazi, munagi mummyu janyu,

<sup>17</sup> na Kiriisitu iikarimu, kubhwisirirya bhana munabhwu. Na ku kubha muni imiri iminagu nu ubhuruza kubhusigi bhwa Kiriisitu,

<sup>18</sup> nirabhasabhira imwi hamwimwi na abharindu bhusi, momenye ubhugari, ubhwina, ubhurihu ni ikihiko chu ubhusigi bhwazi.

<sup>19</sup> Momenye chimbu ubhusigi bhwazi ni-bhukuru kukira ubhwubhuri bhwitu, korereke zeteemwa zaanyu zituubhani na za Mungu.

<sup>20</sup> Mmbe Mungu akumibhwu! Ewe aratura kokora amang'ana gi ikiruguru bhukung'u, kukira ganu tukumabha, hamwi ganu tukukina, aratura kokora. Ewe ahaagakora kuring'aana na amanaga ganu gakokora emeremo muusi witu.

<sup>21</sup> Agungibhwu mwisengerero na kwa Yisu Kiriisitu, muzinyibhuru zusi, kemerano. Garami.

## 4

### *Abhiisirirya bha Yisu bhanu ubhumwimwi*

<sup>1</sup> Mmbe, inyi omobhohwa, ku kubha nirakorera Umakuru Yisu emeremo, nirabhakandikija mwikari ubhwikari ubhuzumu bhanu bhokozomera Mungu wanu aabhabhirikiriiri.

<sup>2</sup> Mubhi bhasuuku, bhanyuhu, abhiigumirirya, na mubhi muriigega kubhusigi.

<sup>3</sup> Mokore umucha kuriibha ubhumwimwi bhanu mwagwataniibhwi ne Egoro Indindu, ku kwikara hamwimwi komorembe.

<sup>4</sup> Itubhushi turi mubhiri gamwi, Egoro Indindu ni-yimwi, na amazumu ganu Mungu atutuuriiri tugiisege, ni-gamwi.

<sup>5</sup> Umakuru wiitu, ni-wumwi, ubhwisirirya bhwiu, ni-bhumwi na ubhubhatiizi bhwiu, ni-bhumwi.

<sup>6</sup> Itubhushi turasengera Mungu wumwi, ewe newe Bhaabha wa bhushi, arakangata bhushi, arakora emeremo kwa bhushi na ariikara mushi wa bhushi.

<sup>7</sup> Nawe Kiriisitu akatoha itubhushi ibhigangi, kuring'aana chimbu umwene indiri.

<sup>8</sup> Necho kigiriryi Amaandiku Amarindu garabhuga,

“Hanu aatiiriri iguru mwisaaru,  
akaja na abhabhisa bhaazi bhanu aagwatiri,  
akabhaha abhaatu ubhunaja.”\*

<sup>9</sup> Mmbe, kubhuga, “Akabhururuka iguru mwisaaru,” enzobhooro yaku niki? Enzobhooro yaku ni-kubha, hanu aari akiiri kuja iguru, akiika haasi kuhika kushi.

---

\* 4:8 Rora Zabhuri 68:18.

10 Ewe wunu iikiri kuhika kuusi hanu, newe aagiiri iguru wa amasaaru guusi, korereke aturi kubhaho huusi mwisaaru na muusi.

11 Ewe newe ahiri abhaatu ubhunaja. Arubhwiri abhandi kubha abhatumwa, abhandi abharutiriri, abhandi abhiinjiriisiti, abhandi abhiimiiririri na abhiija.

12 Akakorabhu, korereke bhaturi kubhatuura bhwaheene abharindu komokorera emeremo, nu umubhiri gwa Kiriisitu gummbakwi.

13 Ring'ana riyo, reng'ehe kuhika itwi bhusi hanu takubha bhamwi mubhwisirirya bhwitu, na komenya Umwana wa Mungu. Turabha abhaatu bhanu tukung'iri chimbu Kiriisitu.

14 Mmbe, tutakubha ncha abhaana abhabhataari, kanyaakibhwa inu ni inu mumakama gwa amiija ganu abhabhihi bhakoreeta. Abhaatu bhayo, bhaheenda bhabharimiryi kumiija gaabhu gu ubhung'ini nu ururimi.

15 Nawe, turiibhi turiibhuurira amaheene kumwayu gwa ubhusigi, turakong'era mumang'ana guusi, kuhikira hanu taraabhi ncha Kiriisitu. Ewe newe umutwi gwa abhiisirirya bhusi.

16 Ewe aragwatan'ya abhaatu bhaazi bhusi bharabha bhamwi, chimbu ibhiimu bhyu umubhiri bhikugwatana, na kubha mubhiri gumwi. Ariibhi ibhiimu bhyusi bhirakora emeremo chimbu ikwenderwa, urakura. Mmbe ariibhi itubhusibhu turakora emeremo ginu Kiriisitu atuhiri chimbu ikwenderwa, turang'eha kukura kwa kusiigana.

*Ubhwikari bhwa nangwina nu ubhwikari bhwi ikari*

17 Mmbe nangu, mwitegeerere! Kubhunjaja bhunu Umukuru Yisu aang'iri, nirabhamenyeekeererya, mutiikara naatu ncha abhaatu bhanu bhatamwizi Mungu. Ebho amiisiigi gaabhu, gataana bhweru.

18 Na amang'ini gaabhu iguru wa amaheene ga Mungu, garibhirwi. Bhari kore nu ubhwikari ubhuzumu bhunu bhukurwa kwa Mungu, ku kubha yo obhogege bhwabhu nu ubhukung'u bhwi imyuyu jabhu.

19 Bhatakorora zisuni nuru suuhu, bhiisikiiryi mozeteemwa zusi zu ubhusimbi. Na bhanu umwuyu gwo okong'eha kokora itaru.

20 Nawe imwi, mutiigiribhu iguru wa Kiriisitu.

21 Nina amaheene kubha, mwigwiri bhwaheene ing'ana na amija iguru waazi. Ewe newe ubhutangi bhwa amaheene gusi.

22 Mukijibhwa kubha, mutigi zeteemwa zaanyu zi ikari, zinu zikusaribhwa nu umwuyu gu ubhukangirirya.

23 Na mokorwe bhahya mumiisiigi ga zekoro zaanyu.

24 Na mubhi ne eteemwa iihya yinu yabhumbirwi na Mungu, mutuubhani neewe, ni-bhaheene muri na abharindu.

25 Mmbe, mutigi ururimi, abhaatu bhusi bhabhi bhariibhurira amaheene, ku kubha itwasi ni-bhiimu bhyu umubhiri gumwi.

26 Mubhi nu ubhwigatani, nawe mutakora ubhubhi, iryubha ritatubhira mukiri mwigatini.

27 Mutamoha Shitaani umweya abhahizi.

28 Umwibhi, atiibha naatu, nawe akore emeremo imizumu kumabhoko gaazi umwene, koreke aturi kubha ne ekegero cho okosondera wenu ataanachu.

29 Mutagamba amang'ana amabhi, mugambi amang'ana amazumu gu ukusakirya abhandi kubhwindi bhwabhu. Gayo, garatura kubha na bhweru kubhanu bhakugitegeerera.

30 Amahocha gaanyu, gatakora Egoro Indindu ya Mungu irumiki, ku kubha ewe ni-rakaamu rwa Mungu kwa niimwi, rana rukwerecha imwi ni-bhaatu bhaazi, kuhika urusiku rana Mungu akubhasabhura.

31 Mmbe, mutigani nu ubhahaari, ubhwigatani, ubhururu, ririgi, amatuki nu ubhubhi bhwa ze-teemwa zusi.

32 Nawe mubhi muriikorera amazumu, mubhi bhi ibhigangi, na mubhi muriibheerera chimbu Mungu aabhabhiiriri imwi kanzira ya Kiriisitu.

## 5

### *Ukwikara chimbu Mungu akwenda*

1 Kwibhu mwigu Mungu, ku kubha imwi, ni-bhaana bhaazi abhasigwa.

2 Mwikari kubhasigiki chimbu Kiriisitu aatusigiri, akiihurucha kukwa iguru witu, akabha ikimweso\* kinu kekoreetya kwa Mungu.

3 Nawe mutabhirwaku iguru wi itaru, umwuyu gwe ebhegero, nu ubhubhuruuru bhwabhwasi ku kubha amang'ana gayo gatakwenderwa kubharindu bha Mungu.

---

\* 5:2 *Ikimweso*. Kumaragirira bhakung'u, rora ikiniibhasa.

4 Mutagamba mang'ana ga suni ganu gataana bhwera, na kuhakaana, gayo gatakwenderwa, nawe mugambi amang'ana gu ukukumya Mungu.

5 Momenye, kwigomba ebhegero kwangi okosengera amasambwa. Momenye na kukandikija kubha abhiimani, abhabhi na abhasiigi bhi itaarũ bhatakugabha chuchusi mubhutimi bhwa Kiriisitu na bhwa Mungu.†

6 Mutiisirirya kukangiribhwa na mautu kwa amang'ana ganu gataana bhwera, ku kubha amang'ana ncha gayo, garagirya Mungu abhatiniri bhanu bhatakumwigwa.

7 Mmbe mutagwatana na abhaatu ncha bhayo,

8 ku kubha ikari imwasi mwari ikiirimya, nawe nangwinu mubhuri ubhwiru ku Mukuru Yisu. Mwikari ncha abhaana bhu ubhwiru.

9 Amang'ana ganu gakwereken'ya muriikara mubhwiru ne-kokora amazumu gusi, ganu Mungu akwenda, na ga amaheene.

10 Mokore umucha komenya ni-kiguruki keko-zomera Umukuru.

11 Mutagwatana na amang'ana gaabhu amabhi, nawe mugaturi habhwiru,

12 ku kubha ganu gakokorwa kwebho kimbisi ni-suni kugagamba.

13 Nawe chuchusi kinu kikumurikwa nu ubhwiru kihaarorekana, na ganu gari mukiirimya gatakusaaga muryamurya, garabha ubhwiru.

14 Necho irabhugwa,  
“Bhuka awi wanu uhindiiri,  
uryuki kurwa mabhaku,

---

† 5:5 *Ubhutimi bhwa Kiriisitu na bhwa Mungu.* Kamaragirira bhakung'u, rora ring'ana *ubhutimi bhwa Mungu* muKiniibhasa.

na Kiriisitu arakumurika.”†

15 Nangu mwiyangariri chimbu mukwikara, mutiikara ncha abhageege nawe mwikari ncha bhu ubhwubhuuri.

16 Mutarimiryā ribhaga, ku kubha ribhaga rinu ni-rya amabhi.

17 Kwibhu mutabha bhageege, momenye ubhwindi bhwa Umukuru niki.

18 Naatu mutagwatwa amarwa, ku kubha iragirya kokora amang’ana ganu gatanzabhini, nawe mwizuribhwi ne Ekorō Indindu.

19 Kugayo, mubhi muragambana kwa zabhuri, amimbu na zitinzi za mokoro inu marimba na kuriiryatira Umukuru mummyu janyu.

20 Na mubhuuriri Bhaabha Mungu azumiryi, siku zuusi kumang’ana guusi, kuriina ryu Umukuru wiitu Yiesu Kiriisitu.

21 Mwisuuiki abheene kobheene ku kubha yu ubhusuuku bhunu munabhwi kwa Kiriisitu.

### *Abhasubhi na abhakari*

22 Abhakari imwi, musuuiki abhasubhi bhaanyu chimbu mukusuka Umukuru Yiesu.

23 Moreenderwa kokorabhu ku kubha umusubhi ni-mutwi gwa mukaazi, chimbu Kiriisitu wusi ni-mutwi gwa risengerero. Neewe ni-Musabhuri wu umubhiri gwazi.

24 Mmbe chimbu risengerero rikusuka Kiriisitu, ibhuibhu na abhakari bhusi bhasuuiki abhasubhi bhaabha kumang’ana guusi.

---

† 5:14 Amang’ana ganu gatakurwa kuBhuragi bhwi Ikari. Irarorekana amang’ana ganu gakakorwa kuryimbu ryi Ikikiriisitu. Kuryimbu rinu bhakakora hagero haaru hi Ibhibhuriya, kokerenjo Isaaya 26:19, 60:1. Rora kwiki Abharuumi 13:11.

25 Imwi abhasubhi, musigi abhakari bhaanyu chimbu Kiriisitu wusi aasigiri risengerero, aki-ihurucha kukwa iguru waryu.

26 Akakorabhu korereke arekore ririndu kwa kuryoja kwa amanzi, kwing'ana ryazi.

27 Akeenda ibhonere risengerero ririndu, rinu ritaana isoro nuru kobhenga kwakwasi.

28 Ibhuibhu irabheenda abhasubhi bhusi kusiiga abhakari bhaabhu chimbu imibhiri jabhu abheene. Wunu akusiiga mukaazi ahiisiiga umwene.

29 Atareeho umutu wunu ahaabhihirirwa umubhiri gwazi, nawe ahaagutuga na kugwangerira. Ibhunimbu Kiriisitu wusi akwangerira risengerero,

30 ku kubha itwi ni-bhiimu bhyu umubhiri gwazi.

31 "Iguru wa gayo, umusubhi aratiga wiisi na unina, aragwatana na mukaazi, na bhabhiri bhayo bharabha mubhiri gumwi."§

32 Imbisi yiyo ni-keru, nawe inyi niragamba amang'ana ga Kiriisitu na risengerero.

33 Nawe na niimwi imwusi nirabhabhurira, abhasubhi bhusi musigi abhakari bhaanyu chimbu mwisigiri imubheene, na abhakari bhusi bha-reenderwa kusuka abhasubhi bhaabhu.

## 6

### *Abhaana na abhiibhuri*

1 Imwi abhaana, ku kubha mugwatiini nu umukuru, musuki abhiibhuri bhaanyu, ko kokorabhu ni ing'ana izumu.

---

§ 5:31 Rora Ubhutangi 2:24.

<sup>2</sup> “U<sup>u</sup>uki wu<sup>u</sup>u na onyoko,” rin<sup>u</sup> neryo riswaja ry<sup>u</sup> ubh<sup>u</sup>utangi bh<sup>u</sup>w<sup>u</sup> ubh<sup>u</sup>uragi,

<sup>3</sup> “korereke obhone omorembe nu ubhwikari sik<sup>u</sup> nzaru ku<sup>u</sup>si.”\*

<sup>4</sup> Na niimwi bha bhaabha, moteendeerya abhaana bhaanyu, nawe mubharere bhwaheene na kubhaha amijja kurwa kuMukuru Yisu.

### *Bhambusa na abhakuru bhaabha*

<sup>5</sup> Imwi bhambusa, musuki abhakuru bhaanyu mucharu hanu, kubhusuuku na kurigita kwa mwuyu gumwi, chimbu mukusuka Kiriisitu.

<sup>6</sup> Mokorebhu, itari hanu bhakubharora korereke mwikombe kwabha, nawe mokore chimbu Mungu akwenda kwa mwuyu mwiru, ku kubha imwi, ni-bhahocha bha Kiriisitu.

<sup>7</sup> Mohoche kwa mwuyu gumwi chimbu kohokerya Umukuru, na itari marahokerya abhaatu.

<sup>8</sup> Mwikari mwizi kubha, ring’ana rizamu ryaryusi rinu umutu akokora, arahaabhwa nu Umukuru kuring’aana na amahocha gaazi, abhi ni-mbusa hamwi ni-mwiyagaaruri.

<sup>9</sup> Na niimwi abhakuru, mubhakorere abhahocha bhaanyu gayogayo, mutabhambahya. Muhiiti kubha imwi na abhahocha Umukuru waanyu ni-wumwi ari kwisaaru, na ataana kimbururi.

### *Ebheseme bhya Mungu*

<sup>10</sup> Itiruru mong’ehe kokong’era kuMukuru na kubhanaja bhwa zinguru zaazi.

<sup>11</sup> Mwibhohe ebheseme bhya Mungu bhyusi korereke muturi kwanga isiimi imbi ya Shitaani.

\* **6:3** Rora Kukuruka 20:12; Amahiitya gi Imigiru 5:16.

12 Nirabhugabhu ku kubha, rihi ryitu ritari iguru wa abhaatu abheene, ni iguru wa abhatimi, iguru wa abhakuru bhi ikiirimya kinu, iguru wa abhasirikari bha amasambwa kowereero yinu itakororekana.

13 Kwibhu mogege ebheseme bhyusi bhya Mungu, korereke urusiku rwu ubhubhi ruraahiki maturi kwitana na abhabhisa, na muraamari kwitana kuhika itinira, mwimuriri bhwima.

14 Mmbe mwimuriri, amaheene gabhi ncho omokena mubhwena, ne eheene ibhi ncha amiib-hoho gu ukwiribha mukikubha,

15 nu ubhwindi bhwu ukuragan'ya Ing'ana Inzumu yo omorembe ibhi nchi ibhikwira kobherenge bhyanyu.

16 Kukira gayo guusi, ubhwisirirya bhubhi siku zuusi nchi ingubha mumabhoko gaanyu, bhubhasakiryi kurimya imibhyi jo omorero gwa Shitaani.

17 Musung'aani ubhusabhuri nchi inguhiira yanyu yi ichuma, ni ing'ana ya Mungu nchi ipanga yinu mukuhaabhwa ne Ekoru Indindu.

18 Musabhi Mungu siku zuusi, kwa teemwa zuusi za amasabhi. Musabhi ibhaga ryusi kwa zinguru ze Ekoru ya Mungu. Mubhi maratengeeza inu marasabha iguru wa abharindu bhusi bha Mungu.

19 Inyusi mansabhiri korereke hanu nikugamba, Mungu abhi arang'a chu ukugamba, nituri kubharwazira abhaatu kwa bhukararu amaheene ganu Mungu irikin'yi kuNg'ana Inzumu.

20 Inyi nihirwi emeremo ju ukurwaza Ing'ana Inzumu yiyo, na yiyo neyo igiriryi niri mokeb-

hoho, m̄nsabhiri korereke nebhone ubh̄kararu  
niragan'yi chimbu nikwenderwa karagan'ya.

### Urubhangũ

<sup>21</sup> Tikikũ umwisirirya am̄siigwa no omohocha  
am̄kindichitũ omoronge wũ Um̄kurũ, arabhaha  
amang'ana gaani gũsi, momenye kinũ nekokora.

<sup>22</sup> Nimutumiri kwa niimwi korereke momenye  
amang'ana gitũ na kubhaha umwũyũ.

<sup>23</sup> Omorembe, ubh̄siigi, hamwimwi nu ubh-  
wisirirya bhibhi kubhiisirirya, kurwa kwa Mungu  
nũ Um̄kurũ Ȳisu Kiriisitũ.

<sup>24</sup> Ibhiigũgi bhibhi hamwimwi na bh̄si  
bhanũ bham̄siigiri Um̄kurũ witũ Ȳisu Kiriisitũ,  
ubh̄siigi bhwa sikũ zũsi.

**Ubhuragi Ubhuhya Mukigambũ chi Ikikiizũ  
Ikizu: Ubhuragi Ubhuhya Mukigambũ chi Ikikiizũ (New  
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

---

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553